

22. marts 2022

UPA2022/161

Nappaatit tunillaassortut akiorniarlugit iliuutsit pillugit Inatsisartut inatsisaat

(Peqqissut Naalakkersuisoq)

Naalakkersuisut saqqummiussaannut Nappaatit tunillaassortut akiorniarlugit iliuutsit pillugit Inatsisartut inatsisaat pillugu siumumiit imaattumik oqaaseqassaagut.

Una inatsisissaq Naalakkersuisuusimasut siuliisa suliaq ingerlassimavaat. Kisiannili 2021-mi apriliimi qinersisoqarneratigut suliaq kinguarsarneqarsimavoq. Qinersereernerullu kingorna Naalakkersuisunngortut suliaq inaarsarlugu nangeqqinnikuuat.

2020-p naanerani Nappaatit tunillaassortut akiorniarlugit pineqaatissiissutit pillugit Inatsisartut inatsisaat nutaaq piareersarneqalerpoq. Tassunga atatillugu Peqqissut Naalakkersuisoqarfimmi naalakkersuisoqarfiup pisortaanit, Nakorsaaneqarfimmit Politimesterimillu ilaasortaqtunik aqtsisoqatigiinnik pilersitsisoqarpoq. Aammattaaq Peqqinnissaqarfiup aqtsisoqarfianit, Nunatta Nakorsaaneqarfianit, politiinit, Sermersooq Kommunimit, Ineqarnermut Attaveqaatigiinnermullu Naalakkersuisoqarfimmit, Ilanniartitaanermut, Kultureqarnermut Ilageeqarnermullu Naalakkersuisoqarfimmit kiisalu Peqqissut Naalakkersuisoqarfimmit upalungaarsimanermut sinniisumit ilaasortaqtunik suleqatigiissitaliorqarpoq. Nappaatit inunnut nalinginnaasumik ulorianartut aammalu nappaatit inuaqatigiinnut aarlerinartorsiortitsut tuniluunnerini ajornartorsiutit pilersartut isumaginissaannut suleqatigiissitat siamasissumik katiterneqarnikuupput.

Peqqussummi § 2, imm. 1-im i nappaatit inunnut nalinginnaasumik ulorianartut aamma nappaatit tunillaassuuttut allat allassimaffik A-mi aamma allassimaffik B-mi peqqussummut ilanngussanut ilanngunneqarput. Allassimaffik A – nappaatit inunnut nalinginnaasumik ulorianartut– ilaatigut tassaapput kupperneq aamma SARS., allassimaffimmi B-mi ilaatigut kolera aamma sakialluut (tuberkolose) ilaapput.

Uanilu Naalakkersusiut paassisutissanik annernik paasiniaareerlutik allasimaffimmi covid 19 A-mi inisisimanissaa aalajangiuppaat.

Inatsisissamik uani qallunaat nunaannut assigiissuseqartorujussuarmik Naalakkersusiut sanapput pissutsinut misilitakkanut assigiissuteqangaartunik misigisaqarnermik aallaaveqarneq peqqutaalluni.

Ataatsimiititaliarsuaq annertuumik nappaalanersuarmik Kalaallit nunatsinnut innuttaasut sapinngisamik ajunnginnerpaamik sulissunniarlugit akisussaaffilerneqarsimavoq. Siunissamilu

aamma nappaalanersuaqqilissagaluarpat ataatsimiititaliarsuarmik
pilersitseqqinnejassasoq inatsisissami ersarissarneqarpoq.

Kalaallit nunatsinni nakorsaaneqarfik innuttaasut nappaammik navianarsinnaasumik tuniluutinnginnissaat pinaveersaarniarlugu akisussaaffimmik annertungaatsiartumik iliuuseqarnissaani aalajangersaanissaat uani inatsisissami ersarissarneqarpoq.

Naalakkersuisullu inuit ornittagaanut napaammik navianarsinnaasumik tuniluunneq annertooq pinaveersaartinniarlugu inerteqqutinik aalajangersaasinnaanerat pisinnaaffimmik annertuumik inatsisissami ersarissarneqarpoq. Kiisalu aamma akiliisitsisoqassappat Naalakkersuisut akisussaaffilerneqarnerat uani ersarissarneqarluni.

Tassa Kalaallit nunatsinni nappaataasartut assigiinngitsut 1950-kkunnili aallaaveqartut aammalu ukiuni kingullerni nualluussuarmi nunarsuarmi naappaalanersuit kinguneranik soorlu Naalakkersuisut nassuaanerminni eqqartugaat pinaveersimatinniarlugit Kalaallit nunatsinni inatsisit nutarternissaat pisariaqartillugu una sananeqarpoq.

Siumumiit pingaartitaraarput Kalaallit nunatta innuttaasa qullersaqarfimmiit peqqinnissaqarfimmiillu pitsaasumik ikiorneqarsinnaanissaannik inatsisitigut sinaakkutaqarnissaq. Nappaatillu inunnut nalinginnaasumik ulorianartutut taaneqartartut aamma erseqqissumik inatsisikkut inissisimatinneqarnissaat. Akisussaaffillu annertusinnaasut sukumiisumik agguataarneqarnissaat inuttalersorlugit ingerlanneqarnissaat, kiisalu aamma pineqaatissiissutinik peqquteqavissunik ingerlatsisoqassappat pingaartippalut pitsaasumik aalajangersaasoqarsinnaanissaa inissaminiissasoq. Pineqaatissiissutillu aamma nalilersortuarneqarsinnaanissaat periarfissaalluartarsasoq Siumumiit isumaqarpugut.

Taamatut siumumiit oqaaseqarluta Naalakkersusiut inatsisissatut siunnersuutaan taperserlugu aappassaaneertinnagut ataatsimiititaliamut susassaqartumut ingerlanneqarnissaa innersuupparput.

Mala Høy Kúko

Siumut